

Wonn ma nochdenckt donn kimmt oan vor, das si in Irdning scho sehr vü gändert hot die letztn 60 Jahr.

Ma woas nit wor friara a bessere Zeit, oda hot ma mit da jetzign mehr Freid,

Es is vü onderst worn aus unsern Schilling is da Euro worn,

Oba was nit gändert worn is unsa Pforrkirchn und s Kapuziner Klosta des is gonz gwiss

Und die Volks und Hauptschul tuat a no am gleichn Plotz stehi

Und es iss a Freid wia vü Kinder do jeds Jahr tern ei und aus gehi,

Gosthaus Gabriel tuat a no sei, die Grimming Drogerie, dir Gärtnerei Pranzl, die Weinkellerei Hofer, und die Trafik, follt ma ei.

S Gosthaus Hirschenwirt tuat no sei ,oba do is scho long die Pizzeria Mona Lisa trei.

Des Gosthaus Meisterl, Kargl und Kanzler, Eberhart tuats scho long nerma gebn und do is ollwei so gmiatlich gwen.

Da Graberwirt is a vapoht worn vor a Zeit und des führn Ungarn heit.

S Kaffeehaus Hofa hots s amol gebn und des hom zwoa Schwestern geführt und späta donn des Cafe Central wird.

Gosthaus Geier tern neue Besitzer hom und leider koa Gosthaus mehr sei und do san olle so gern kehrt ei.

Die Kegelbahn in Irdning tuats a nerma gebn und es san donn aus Nah und Fern olle sehr traurig gwen.

Die vülln Musikabende ban Rudorfer mit erstklassign Musikantn wern ma nia vagessn, wo ma olle so gmiatlich san banonda gsessn.

Die Gabrielsöhne hom für die Gastromobie gonz vü beirogn, wei mir tern a Restarant ,a Disco, an Keller, a Marktcafe und a Londgosthaus in Irdning hom.

Und was uns a recht gfreit wei mir hom hiatz s Dörfl, s Mundort und Café Sunn in Folkenburg scho a Zeit.

In Gugelhupf tuats scho long nerma gebn und do hots ollwei so guate Tortn gebn.

A va die Geschäfte hot si gonz vü gändert die letztn 60 Jahr

Nur s Kauf und Modehaus Puchwein gibt's no kimmt ma vor , vergrößert is worn und aussn Adeg is a Sparmarkt worn,

Wo friaha s Kaufhaus Vasold und Gosthaus und Fleischauerei Kanzler donn Eberhart is gwen.

Tuat donn da Finkenhof, Steirerbratl und donn da Höpflinger später da Letmaier entstehi,

Um an Finkhof is wohl is wohl recht schod des muas ma wohl sogn ,

wie mir tern in Irdning koan grossn Speisesool mehr hom,

Bold hom donn olle in Stondort valossn, wei da Letmaier ziagt obi in die Trautenfelserstrossn,

Wo friaha s Foto Wolcha mit Fohrrader und Zubehör is gwen, is hiatz in Tom sei Beisl,

des is nit recht gross . oba ollwei vü los,

Des Kaufhaus Schneider tuat a no guat in Erinnerung sei, wei do hot ma olls zan kafn kriagt was ma hot wolln, Lebensmittel ,Textiln Getränke und sogor Kohl.

Donn wor no da Spar Bliem trei a Zeit, oba donn wors scho mitn Kreuzer Pfusterer so weit,

Do gibt's vü schöns Trochtn und Mode Gwond und vü Hondorbeitn und Bastelsochn,

oba a vür die Jogd ,ma kann olls kafn die Freid mochn.

S Stonitsch is a amoll a und Modehaus gwen und do hots a gonz schöne Mode und Trochtnsochn gebn.

A Kaufhaus Kemmetmüller vor longa Zeit in Irdning wor und noher no da Konsum in da Klostersgossn wor,

Und seit a poor Jahr tern ma a Grimmingglöckerl an Bio Bauernlondn in Irdning hom,

Die zwoa Schlecker Gschäfte hättn uns a gmocht a grosse Freid, oba die hom leider wieda zuagspiat noch a Zeit.

Nia vergessn wern mir Irdningerleit wia da Prinschütz mit sein Standl auf sein Platzl gstondn is vor longa Zeit. Jedn Tog, ba jedn Wetta is a auf da Stossn mit sein Radl und Hänger va Stainach umakemma.

Die Kinda hom Schleckerein kafn kinna zu jeda Zeit und die Erwachsenen mit Obst und Gemüse und ondre Sochn ghobt a Freid, sei lLoga in Hofa Kella wor und do hot a einspern kinna sei Wor. In da Bäckerei Weiss donn Kettner tuat da Stefflbäck a Zeit scho sei und in da oanzign Bäckerei mitn Kaffeestüberl kehrn fü Kundn gern ei.

S Nondlbäck Pachernegg, donn Steininger tuats a scho länger nerma gebn, und do iss ollwei so guat einkafn gwen, wei van Maikäfabrot tern ma heit no redn, Des beste Eis hots ban Eisferdl Pachernegg gebn, oba des wissen die Irdninger eh des gibt's a heit no in da Maria ihrn Markcafe.

Die Hofa Wollstubb tuat a scho long nerma sei und do is hiazt a Fotowersstott trei. In friarign Fink Schlochthof ko ma a ban Klingler Frischfleisch, Wurst, Geselchtes und no vü ondere a no kafn heit.

Wie jo leida Steirerbradl zuagspiat hot vor longa Zeit.

Seit 2007 tuat da Billa sei und do ko ma, a wia ban Sparmarkt, Frischfleisch und Backwarn kafn ei. Mitn Bauernmorkt jedn Donnerstog hom a vü a grosse Freid, wie do ko ma olls frisch kafn, wos erzeugn die steirischn Bauersleit. Frühra hots vü Bauern in Irdning gebn, oba heit tuats nur mehr in Schwab in Muhra, Striednig, s Oltreiter und in Reitmoar gebn. Da Spolt und da Weis Sepp und die Hedwig Weis hom no Kiah ghobt in die 70er Johrn. Oba donn san ollwei weniger worn.

Ban Gabriel homs no Mutterkuh Haltung ghobt no bis ins 2000er Jahr Und donn nur mehr Rösser ghobt a poor.

Ban Geier, Kackl, Kanz, Ettinger Leopold und Josef, sowia ba Seebocha, Sommer, Fleischmann, Meyerl, Pachernegg Hans und Korl un d ban Rettenegger donn Peer, hom olle a kloane Londwirtschaft ghobt.

Ba die kloan Bauern hots sie s wiatschoftn nerma glont mit da Zeit Und die Jungan hom a mit da Bauernorbat a nit ghobt so a Freid So hots a in Irdninder Moos a Veränderung gebn, es tern weit weniger Heustodln stehn.

Die kloan Grabln san vaschwundn und die sauren Wiesn san trockn glegt worn Und hiazt kinnan die Bauer de no san, lauta guats Fuatta einfohrn.

Und des wor so schoi in da entrign Zeit wia im Moos no die Rechal und Hosn Umanonda gsprunga san volla Freid. Schwednreida oda Hifla tuat ma a koa nerma sehn, oba dafür tuats rundumandum Silobinckln gebn.

Oba a ba die Firmen hots Veränderungen gebn, es tern vü nerma bestehn.

Es gibt koan Glosera Hormayer und koan Tischler Haring und Stieg mehr, koan Schuasta Ettinger Josef und Leopold und koa Schuahgschäft Klammer mehr.

Die Zimmerei Baumgartner tuat a nerma sei, sowia s Taxi und Frächtereia Parra follt ma ei. In Huatara Hable sowia s Elektro Pfandl, Wenzl, Spatzek und Elektro Herrmann tern olle scho long nerma sei. Oba zan Glück homa in Schretthausen follt ma ei.

Die Baufirma Poschinel donn Schönwetter, sowia Lindner Huber und donn die Zimmerei Stiegler tern olle nerma sei, oba hiazt iss da Dochdecker Weis und Holzbau trei.

Da Rauchfongkehrer Haidler tuat die Firma von Rom übernehma und ban Mechaniker Leeb is da Göschl kemma.

Da Molamoasta Depaul hot a aufgehört vor a Zeit, oba do hom zan Glück in Kernbichler und Ilsinger a no heit.

Die Dechler Schmiede is obn Gabriel gstondn amoll und des is so schoi wei es tuat mitn Enkl olls Schweiger weiter gehi.

In Uhrmocha Adamek hot die Familie Meier übernuma und weitergeführt,

Oba vor John ist die Firma teilt worden. In Schmuck Meier tuats no in gleichn Lodn gebn und in Uhrmocha mit Fischerei Zubehör tuat hiazt in Folknburg unt bestehi. Die Spenlerei Pachernegg gibts scho sehr, sehr long und des tuat uns a olle gfrein und des is so schoi, wei die Firma tuat mit die Jungen weitergehi. Die Schneiderei Bachinger und in Lederhosn Heidl hots a amoll in da Klostergossn gebn und später is no da Schneider Moser gwen. In Sottler und Tapezierer IIsinger hots a scho länger nerma gebn. Die Gerberei Tholhoma is a amol für vü a Orbatsstöl gwen, oba leider tuats die heit a nerma gebn. Mit da Gerberei is scho long a Rua, wei in Tholhomahaus is hiazt in Moreau sei Werbe und Projekt Argentur. Die Wognerei Meierl hot da Schöttl übernuma scho vor longa Zeit und weitergeführt in Folknburg und auf da Planerolm hiazt mit die Jungan mit vü Freid Da Friseur Seebocha tuat uns a no in guata Erinnerung sei und der hot sein Salon ghobt in Gabrielhaus trei. Donn hot no da Friseur Kobatsch und da Mitterndorfer in da Klostergossn ghobt an Salon und donn is e da Friseur Annalies kema schon. Vor kurz is da Salon übergeb norn in junge Händ und ma siachts das olls guat weiterrent. Da Sylvia ihr Naturhoorstudio hots a gebn a lange Zeit, oba ih ho grad erforn , do is zuagspiert worn. Und do hom a olle a Freid , wei es gibt an Friseur Haargenau in da Trautfelserströssn seit neuerster Zeit. Und wos uns wohl a recht gfreit, wei es gibt vü Therapeutn, Wohlfühlstudio und Massageargenturn in Irdning heit. Und olle san sehr bemüht, das da Schmerz besser wird. Oba a geistig fit und in Adi sei Gesund fit tern ma in Irdnung hom und des tuat olls gonz vü für Geist und Wohlbefindn beitrogn. Turn und Tonzstundn tuats a scho long in Irdning gebn und des is so wichtig fürs gonze Lebn. Und für Unterhaltung und Weiterbildung tern ma a scho sehr long a Leihbücherei in Irdning hom. Und a gonz grosse Freid mocht uns unsa Bücherlodn scho a längere Zeit. Ban ATV hots a in Irdning grosse Veränderungen gebn. Wei in die 60er John, des is eh fost nit zan glabn oba wohn in die Mooswiesn da Fuassbollplotz wor. Die Umkleidekabin iss in an Heustodl gwen, des kunt ma si heit nerma vorstelln. Aufn Pachernegg Grund und aufn Unionplotz is donn no gspült worn a Zeit oba donn wos scho mit ATV Plotz so weit. Gonz kloa is mitn baun ongfongt worn und mit die John ollwei grösser worn. Zwoa schöne Fuassbollplätze tern heit sei grosse Kabinen und sogar a Tribühne mit an Stüberl folit ma ei. Des Sportlerstüberl wern ma a nia vagessn, wo ma oft so gmiatlich san banonda gsessn. Gfeiert is ollwei worn ba an Sieg, Unentschiedn oda valorn. A Laufboh und zwor Tennisplätze, a Asphaltboh und zwoa Vollybollplätze tern ma am ATV Plotz hom scho a Zeit und do hom die Sportler olle a grosse Freid. Über an Sieg tern si olle mitgfrein ba jedn Verein. Und wei da Sport so wichtig is im Lebn, tuats seit a poor Jahr in 24 Stundnlauf in Irdning gebn. Wonn ma zruck denkt vor 60 Jahr wia die Gemeinde no im erstn Stock ob da Sporkassa wor. Und im Paterr is die Post trei gwen zu der Zeit und donn no in Pforrhof bis das wor mitn neun Omtsgebäude so weit. Unser Bürgermeister Rudorfer wor zu der Zeit. Des wern ma a nia vagessn, wia in 1990er Jahr ba unser 850 Feier mitn Motto , Leben und Arbeit im Wandel der Zeit, olle Irdninger mitgmocht hom mit grossa Freid. Sogar unser Londeshauptmann is noch Irdning kema und tuat in Spatenstich für unser neus Omtshaus vornehma. Mitn Kino va da Familie Finger hom olle ghobt a grosse Freid, bis kema is die Fernsehzeit. Donn is obgrissn worn in die 80er John. In neun Gemeindehaus is aussa die Räumlichkeiten va unsrer Gemeinde, no die Post, a Rotkreutzraum und die Freiwillige Feuerwehr eini kema und die Irdninger Bürger tern des olls gern in Anspruch nehma. In unsrer Gemeinde hot si a vü gändert die letzn 60 Jahr. Am Onfong unser long Bürgermeister Meierl und donn da Bürgermeister Rudorfer wor. Gonz jung und 20 Jahr donn unsa Franz Titschnbacher unsa Bürgermeister wor. Und seit 2013 tuat da Herbert Guggernig unser Bürgermeister sei und setzt si für uns olle bestens ei. Bürgermeister sei is ollwei schwieriger worn in die letzn John 3 Gemeindn san zomlegt worn und es tuat bestimmt nit orfoch sei ,

Oba unsa Gemeinderot setzt si mit volla Kroft ei. Onfong va die 55er Johrn san noch Irdning die erstn Touristn kema und donn noch a Zeit gonz vü zuanehma. Fost jeds Haus tern Gäste aufnehma, wei es san sovü Deutsche kema. Da Dürrnagl hots brocht und noch drei Wochn mit sein Reisebus wieder gholt. Und die Hausfrau hom ghobt a Freid, weils a a wenk wos verdient hom in der Zeit. Ahorn is unser Partnergemeinde und mit Freissing a Fuassbollfreundschoft worn. Tourismusobmänner hots kurz mera gebn oba da Spatzek und die Gabrielmuatta san am länstn gwen. Büro ban Spatzek, Mandl, Weiss und auf der Gemeinde wor und donn is scho in nein Busbohnhof eini kema kimt mir vor. Tourismus gibts nerma so vü in Irdnibg heit, dafür wern vü neue Wohnhäuser baut in letzter Zeit. Aus da Sporkassa is donn die Steiermärkische Bank worn vor longa Zeit und olle Irdninger san froh das die a no gibt heit. Die Volksbank hots a amoll gebn in da Trautnfelserstrossn, oba die hot uns scho wieder valossn.

In die 60er Johrn hots die Raika no in Oltirdning gebn und donn bis 2017 no in Irdninger Morkt obn is gwen. Wei donn wors so weit und mit da neun Raika in da Trautnfelserstrossn hom olle a gonz grosse Freid. In da Post iss no die Bawag trei und so tern drei Bankn in Irdning sei. Unsa Polizei wor friara hie Gendarmerie und wor in 40er Haus unterbrocht in der Zeit bis das in Gerichtsgebäude wor so weit. Gericht tern ma oba koas mehr in Irdning hom, wei die son noch Liezn obizogn. Sehr guate Ärzte hots die letztn 60 Jahr in Irdning scho ollwei gebn. Die Frau und da Herr Dr. Kopetzki und do Dr. Lämmerra is gwen. Donn hot da Herr und die Frau Dr. Täupl und donn hot da Dr. Giesmaier olle Patienten guat betreut bis das wor mitn Dr. Hasipeter und mitn Dr. Köberl is gwen so weit. Und zweng da Hausapotheke ko leider koa Praxis mehr in unsern Ort sei. Oba Gottseidonk tern ma unser Augenärztin und Frauenärztin und in Zohnorzt Streissnig in unsern Morkt scho hom a lange Zeit und des mocht uns olln a Freid. Guat in Erinnerung tuat uns no da Zohnorzt Schuster sei, der hot si zu jeder Zeit gsetzt für uns ei. Und mit unsern Optika Peter homa a a gross Glück, wei der sorgt dass ma olle hom an guatn Blick. Oba a an Notar, an Steuerberater und Rechtsanwälte, Versicherungsmakler, sowie Sicherheitstechniker die olle tern in Irdning sei und setzn si für jedn guat ei. An Baumeister Seebacher und s Baumanagment Zelzer, die Firma Spreitz Beton, Bohren, Schneiden die tuats olle in Irdninger Morkt gebn, oba die meistn Firmen tern in da Trautnfelserstrossn bestehn.

Do gibts ETS Egger, in Glas Peyrer und eco-tex Photovoltaik Peer, Erdbau Baumgartner, Junger Baugesellschaft, sowie Transporte Lechner GmbH, Vollwärmeschutz Petuschnig, KFZ Lutzmann, Servis und Handel, Add Com und dugra druck grafik, Peckl Instalateur und die Firma Vogl Plus GmbH wern ma a wieder bold im Gewerbepark hom, wei do iss scho ausgschobn. Mit da bäuerlichn Biowärmeliefer Gesellschaft Irdning hon a vü a grosse Freid, wei ma braucht nerma selber hoazn wie in da entrign Zeit. Und die Senkgruabn wos no worn in die 60er Johrn tern ma a gottseidonk nerma brauchn wei ma scho long a Kläronloge hom. Und des wern ma a nia vagesn wie ma no in die 70er Johrn, unsern gonzn Müll tern in Puchweingravn no entsorgn. Zan Glück tern ma hiazt scho long a Obfollzentrum hom. Unsa Hausmüll wird a obgholt olle zwoar Wochn ba jedn Haus und gebn sich voll aus.

Unser Gemeinde Kindergortn friaha in da Lindnallee is gwen und die unvergessliche Tante wor die Schwester Amerante. Oba hiazt tern ma scho long an gonz modernen Kindergortn und a Kinderkrippe in da Schulgossn hom. Und in da Niederlsiedlung tuat no da Montessori Kindergortn sei und überoll san glückliche und gut behütete Kinder trei. In unsrer Pforr hot si a ollerhond do, mir hom sch long nerma koan Koplo. Da Messna Moser hots no leichter ghobt in da entrign Zeit, des tuat olls onderst sei heit. Hiazt muass da Pforrsekretär für vier Pforrn a no die Messnerorbat mochn und des tuat unser Steiner Sepp mit vü Zuvorkommenheit und Wissn schoffn.

Im 58er Johr unser Pforra Hölbing donn unser Pforra Karner a lange Zeit wor. Danoch is da Pforra Riemer kema und gonz kurz da Pforra Zuber, ausgholfn hot donn gottseidonk no da Msgr Kobilka a Zeit bis das mit unsern Pforra Prohaska wor so weit. Den hot uns unser Herrgott gschickt, wei mir hom a gonz a gross Glück. Oba er muass gonz vü schoffn in da Priesterormen Zeit. Gottseidonk tern ma in Irdning unsre Kapuziner hom und olle helfn recht zom. Unser Kapuziner Kloster gibts scho a lange Zeit, wei in 2018er Johr homa 300 jähriges Jubiläum gfeiert mit grosser Freid. Renoviert is worn vor Johrn. Oba Sorgn mochn si olle Leit, wei koa Nachwuchs noch kimt mehr heit.

Unser Bruder Wolfgang is mitn Bruder Rudolf gonz allor und miassn gonz vü leistn und toa. Zan Glück terns die Elisabeth hom, wei si tuat für die Gemeinschaft gonz vü beitrogn. Ba unsern Altersheim hots a a gonz grosse Veränderung gebn, wei heit homa a gonz modernes Pflegeheim stehi. Gonz kloa wors no in 60er Jahr und oar Zimmer für Wöchnerinnen reserviert wor. In da heutign Zeit fohrt jede Muatta ins Kronknhaus wonns is so weit. Neue Vereine san a gegründet worn in vergangener Zeit und olle Pensionistn und Senioren hom mitn zomkema a grosse Freid. Unser Musikkapelln und Feierwehr tern a neue Vereinslokale hom und leistn vü und keman a jedsmol gern zom. Mit unsern Kirchnchor und Männergesangsverein bereitet uns a ollwei a grosse Freid wonns mit a Aufführung is so weit. An Kommerotschottsverein tern ma a scho long in Irdning hom. Recht a Freid und es passt sehr guat in unsre wunderschöne Gegend tuats Dörfel mitn Wirtshaus und die liabn Wohnholzhäuserler und mitn Campingplotz sei. Oba des grosse schwarze Kaba passt nit gonz guat am Ortseingong tern vü Leit sogn. Und wei da Radsport recht zuagnuma hot in letzter Zeit, gibts vü asphaltierte Radwege heit. Mitn Badesee hom a vü a Freid und wird guat onnuma va die Irdningerleit. Ba da Bestattung hots a a Änderung gebn wei ma tuat in letzter Zeit weniger Erdbestattungen oba ollwei mehr Urnengräber sehn. In da Technik is in die letztn 60 Jahr wohl gonz vü gschehn, wei in 58er Jahr hots nur an Radio oba no koan Fernseher gebn. In letzter Zeit tuat die Forschung scho sehr weit sei, wei durchs Internet und die Händy is ma informiat und verbundn mit da gonzn Welt. Und hiazt tuat no da Roboter kema bold wern ma uns gor nerma auskena. Veränderungen hots a in Olt Irdning und Raumberg gebn, die Zimmerei Schweiger und die Tischlerei Plank tuat ma scho long nerma sehn. Koa Sägewerk Leitner und koa Kaufhaus Lemmerer und Dangel follt ma ei, oba die Reiter Sog und die Pilz Schmiede tuat ollwei no sei. Und die Elektrotechnik Haberl tuats a in Olt Irdning no gebn. Die kloan Londwirtschoftn hom in Oltirdning aufgehört vor a Zeit, oba die grossn Bauern gibts gottseidonk olle no heit. In da Versuchsanstalt Gumpenstein hots si a gonz vü do, in die letztn 60 John, die Stallungen san modernisiert worn. Die Versuche va Gumpenstein san weitem geschätzt und bekohnt im In- und Auslond. Die Raumberger Schul is a scho a poormoll vergrössert worn in die 60 John. Am Onfong hots nur Studentn gebn, oba hiazt tuat ma a sehr vü Studentinen sehn. Ih ho Veränderungen niedergeschriebn, wos in die letzn 60 Jahr in mein Gedächtnis san blieb. Es is scho seit die 58er John gonz vü onderst worn und des mocht ma scho a wenk Sorgen. Friha is ma durch unsern Morkt gonga volla Freid, oba leider siacht ma fost koani Gschäfte mehr heit. Oba unsern Gemeiderot wird sicha sei a Bestrebn und unsern schön Morkt wieder belebn. Da Verkehr durch Irdning hot leider a recht zuagnuma in letzter Zeit und do hom holt die Bewohner nit recht a Freid. Mir olle tatn uns wünschn das uns die EU mocht koani grossn Sorgen in die kommendn John. Und so tat ma uns wünschn olle mitnond, das unser liebliches Irdning long erholtn bleibt in unsern schönen STEIRERLOND.

Ihr Erinnerung an Steffi Fleischmann
seit 60 Jahren Irdningerin